

# 336 PERAJURIT MUDA UDARA TAMAT LATIHAN



[airforce.mil.my/berita/acara-rasmi/5094-336-perajurit-muda-udara-tamat-latihan](http://airforce.mil.my/berita/acara-rasmi/5094-336-perajurit-muda-udara-tamat-latihan)

IPOH, 15 Jun 19 – Seramai 336 Perajurit Muda Udara (PjM U) telah berjaya menamatkan Latihan Perajurit Muda Udara Siri 60/2019 di Akademi Tentera Udara hari ini. Majlis istiadat perbarisan tamat latihan ini telah disempurnakan oleh Panglima Tentera Udara, Jeneral Tan Sri Dato' Sri Hj Affendi bin Buang TUDM.

Pada majlis ini, PjM U Muhammad Khairul Fauzan bin Rahman telah dinobatkan sebagai PjM U Terbaik Keseluruhan dan menerima Piala Pusingan Panglima Tentera Udara. Bagi anugerah PjM U Akademik Terbaik telah disandang oleh PjM U Ardi Mansyah bin Rahman @ Latman dan menerima Piala Pusingan Panglima Pendidikan dan Latihan Udara manakala PjM U Andrew Prakash A/L James dinobatkan sebagai PjM U Penembak Terbaik dan menerima Piala Pusingan Asisten Ketua Staf Tadbir. Bagi Flait Keseluruhan Terbaik pula dinobatkan kepada Flait Bravo yang menerima Piala Pusingan Komandan.

Kesemua 336 PjM U ini telah menjalani latihan hampir 6 bulan sejak 8 Jan 19 hingga hari ini. Di dalam latihan tersebut, PjM U telah didedahkan dengan modul latihan seperti jasmani, kawad, pengendalian senjata, latihan medan, etika tentera, pengetahuan awam serta modal insan. Melalui modul-modul latihan tersebut, para pelatih dilatih sebagai seorang perajurit muda yang akan menggalas tugas dalam mempertahankan kedaulatan Negara.

Selain itu, PjM U juga turut dipupuk semangat kerjasama dalam satu pasukan yang merupakan elemen penting dalam membentuk jati diri seseorang perajurit muda udara. Bagi melahirkan perajurit muda yang berkualiti, aspek rohani juga turut diberikan penekanan. Hal ini bertujuan membentuk sahsiah diri bagi setiap PjM U. Mereka dikehendaki untuk bersama-sama melaksanakan solat berjemaah pada setiap waktu serta menghadiri kelas Pendidikan Islam bagi PjM U muslim manakala kelas Pendidikan Moral bagi PjM U bukan muslim.



Turut hadir di istiadat perbarisan ini adalah Panglima Pendidikan Dan Latihan Udara, Leftenan Jeneral Dato' Mohd Asghar Khan bin Goriman Khan TUDM; Panglima Bantuan Udara, Mejai Jeneral Dato' Haji Mohammad Salleh bin Haji Osman TUDM; Panglima Wilayah Udara 1, Mejai Jeneral Dato' Zahani bin Hj Zainal Abidin TUDM serta pegawai-pegawai kanan TUDM.



